



**LOMIGA
MATI
&
APERILA
2026**



ANOTUSI

**FA'AU'UINA O TOFIGA
ALOA'IA O LE KOLISI
FA'AFAlFE'AU I KANANA
FOU**

1

LAUGA

2

**OSIGA FEAGAIGA
EFKAS AMANAVE**

3

**LOTU MAFUTAGA TINA
MATAGALUEGA SISIFO**

5

**FONOTAGA
MATAGALUEGA SISIFO**

5

**TUSITUSIGA
FA'ALEAGAGA**

6

**'AUFAlGALUEGA
AGAVAA MO LE
GALUEGA TAUSI AULOTU**

11



“FA'AU'UINA O TOFIGA ALOA'IA O LE KOLISI FA'AFAlFEAU I KANANA FOU”

O le sauniga faapitoa na fa'au'uina ai tofiga fou o le Kolisi Fa'afafeau i Kanana Fou sa faataunu'uina lea i le aso 25 o Fepuari 2026. O lenei sauniga na fa'ataunu'uina i le malumalu “Ua Taunu'u” i Kanana Fou. O le ta'ita'i o le sauniga o le susuga i le sui ta'ita'i fono a le ekalesia aoao, le Faifeau Toeaina ia Leatulagi Faalevao mai le Ekalesia i Amouli. O le faalauiloina o tofiga fou na saunia lea e le failautusi a le ekalesia aoao, le susuga i le faifeau ia Nafatali Faleali'i.

O le tofiga o le peresetene ua filifilia ai le susuga i le faifeau foma'i ia Pasesa ma le faletua ia Sharma Sapolu. O le tofiga o le sui peresetene ua filifilia ai le susuga i le faifeau foma'i ia Ioelu ma le faletua ia Agapeitos Onesemo. O le susuga i le faifeau faiaoga ia Craig ma le faletua ia Vaoita Masaniai ua filifilia i le tofiga o le fa'atonu o mataupu tau a'oa'oga (*Academic Dean*).

Ua tofia le susuga i le a'oa'o ia Etele ma le faletua ia Tavai Faleali'i e avea ma faiaoga o le mataupu silisili i totonu o le kolisi fa'afafeau. Na faamaonia ia tofiga e le sui ta'ita'i fono ia Leatulagi Faalevao, a'o le tatalo na fa'apaiaina ai tofiga na saunia lea e le susuga i le Faifeau Toeaina ia Ioane Evagelia mai le Ekalesia i Utulei.

O se upu faamalosi 'au mo le au fa'au'u na saunia lea e le susuga i le Faifeau Toeaina ia Eleasaro Fa'ata'a mai le Ekalesia i Petesa Tai. O le autu o mafauauga “Tapena Ta'ita'i o le Lumana'i e Feagai ma le Vanu.” O vi'iga o le sauniga na saunia lava e le Kolisi Fa'afafeau i Kanana Fou. I le mae'a ai o le sauniga, o le susuga i le fa'afeagaiga ia La'au Tanielu o le Ekalesia Fa'apopotoga Kerisiano i Samoa mai Western Spring, Aukilani, sa fai ma sui o aiga o le faifeau foma'i ia Pasesa Sapolu, e fa'afetai ai le ekalesia e ala i ana filifiliga, ua afea ai se tasi o tama fanau a lo latou aiga i le tofi peresetene i le Kolisi Faafafeau i Kanana Fou. Fa'afetai fo'i i tama o le Ekalesia na mafai ona auai i lea fa'amoemoe, ua maua luga ai lea aso taua mo le Kolisi Fa'afafeau.

Saunia Sau Ifopo AKF

O LE LAUGA

Matua: 1 Nofoaiga Tupu 19: 13

Manatu Autu: “Tali atu i le Fēitaga’i”

“Ia e fa’amalosi, ma ia fa’amalolosi i tatou ona o lo tatou nu’u, ma a’ai a lo tatou Atua; a ia faia e le Ali’i le mea finagalo i ai o ia.”

Ina ua mavae le tafeaga, ua toe fo’i le fanauga a Isaraelu, fo’i lava ma le lē mautonu o le loto, e le o mautinoa fo’i e le to’atele poo fea o le a aga’i i ai le nu’u. O le taimi o le ‘auē ma le tagitu’i. Ua o se va’a e fa’atutū i matagi lagona o le nuu, ae ua o se tautai e afatia i vasa. O tusitusiga o loo fa’amanatu mai pea Isaraelu o le nu’u filifilia o le Atua. O manatu o loo atagia ai le fa’amoemoe ola i tagata, o le a saogalemu le malo o Isaraelu auā o loo tausia i aao o le Atua soifua. E le gata la o se amataga fou, ae o loo aumai ai le lagona fa’amalosi mo le nu’u o le Atua, ina ia fa’afouina i le itu fa’aletino aemaise le itu fa’aleagaga. E ui ina feagai le nu’u ma le lagona fefe ma le lē mautonu, ae o lo’o susulu pea le malamalama o le Atua e ta’ita’i ona tagata. O le toe fo’i mai o le fa’ailoga o le toe fa’aleleia o mea sa fa’aleagaina, ae o se valaau ina ia toe fa’amausali le fa’atuatua ma le ola fa’alagolago i le Atua. Ua avea le tafeaga e fai ma a’oa’oga i loto ma mafaufau o le nu’u. Masalo ana usita’i Isaraelu i le Atua, atonu e le o’o le tafeaga i Papelonía.

O le ta’ita’iga a Tavita, na filifili e auina atu ana ‘au, ua fa’aalia ai le taūa o le tiute fa’ata’ita’i. O le puipuia o Isaraelu, ma le tali atu i le fa’amata’u ma le faitaga’i. E taūa le fa’ailoa e Tavita o lona agalelei, ae ua sili atu ina ua ia fa’ailoa le agalelei o le Atua. O le Atua fai mea mafai, o loo ta’ita’ina ma fa’atonutonu folau le malaga a le nuu o Isaraelu. O fa’ailoga va’aia ia o le feagaiga i le va o le Atua ma Tavita. Ua folafola mai e le Atua, o le a la fa’aeaina le aiga o Tavita e fa’avavau. O lona uiga o le a fa’aauau pea ona pulea Isaraelu e le gafa o Tavita. O le

amataga lea o feese’eseaiga i le va o le nuu o le Atua ma isi malo tuaoi. O loo fa’amaumauina i tala o taua i le mataupu e 18, 19, ma le 20. E feso’ota’i fa’atasi ia tala i le fa’alauteleina o le malo o Isaraelu, ma le fa’ataunu’uina o folafolaga a le Atua na tu’uina i le tupu o Tavita.

O se fa’asoa a o se tu’u-a-lalo lea a le talalelei mo tatou uma e ala i lenei lamepa. A o fa’aauau pea la tatou savaliga o lenei tausaga, o lo’o tatou feagai pea ma fetaua’iga ma le faitaga’i i le tele o taimi. E le gata i totonu o malo, totonu o nu’u ma le ekalesia, fa’apea totonu o aiga. Ua avea foi ma ala e fa’avaivai ai le to’atele i le ola tautua ma le ola galulue auā se lumana’i manuia. O le fesili fa’atupu manatu, “O fea tatou te maua ai le to’afilemu moni? Fa’amata e maua e le tagata le to’afilemu pe a aunoa ma le Atua?” E ui ina finagalo le Atua ia nonofo fealofani tagata uma, a o le tagata lava e mafua ai le fevaevaea’i ma le felotoa’i. O ala o le Atua e ta’ita’ina ai i tatou ina ia maua e ona tagata le filemū. Aua ne’i avea le ese’esega o manatu ma lagona o tagata, e mafua ai le ola fefulitua’i o le tasi i le tasi.

Ua lava saunia ea i tatou e tali atu i tīga ma puapuaga o le ola e afua mai ona o le faitaga’i? Pe a fai tatou te lē ola sauniuni ma malamalama i mea e tutupu i le soifuaga, o le a faigofie fo’i ona lepetia le matagofie o mafutaga i totonu o le ekalesia, nuu, ma aiga. O le a pu’ea fa’amanu ofaga tatou i mea e tutupu o lenei olaga, auā e le moe pea le fili. E mafai ona tatou tali atu i le faitaga’i pe a tatou maua le filemu o le Atua ma tatou tumau i le fealofani. Ona tatou lafoa’i lea o tatou leaga, ma fa’afeiloa’i atu i le alofa le fa’atuāoia o le Atua. O Iesu Keriso na itagia ma inosia ona o le galuega na la faia mo le lalolagi agasala. O lona satauro o le fa’ailoga o le alofa tunoa e tineia ai le faitaga’i. O le fa’amagaloga sili, ma le alofa ua ato’atoa lelei. Ala ia o le manumalo o lo’o ola ma soifua ai o tatou tagata. Ona o Iesu, Amene.

Fa'apaiana o le Faifeau Fou ma lona Faletua mo le galuega i Amanave, Rev. Sasa & Tuaefu Satoa



Ua matua maua lava le viiga o le Atua ona ua fa'ataunu'uina ma le manuia le momoli ina o le faifeau a Amanave, le Susuga i le Faifeau Samoa ia Sasa ma le Faletua ia Tuaefu Satoa. Sa fa'ataunu'uina lea fa'amoemoe i le Aso Faraile, Aperila 10, 2026 sa feiloa'i ai aiga ga lua ma le nu'u i totonu o le fale o le ekalesia (Hall). Na soso'o ai lea ma le Lotu e fa'apaiana ai le Susuga i le Fa'afeagaia ma lona faletua i le taeao o le Aso To'onai, Aperila 11, 2026.

Na ta'ita'ina le sauniga lotu e le Susuga i le Faifeau Toeaina, Fa'aetete Saifoloi, o le Pulega Fofu ma Alataua. O ia fo'i o le Taitaifono a le Ekalesia Fa'apotopotoga Kerisiano Amerika Samoa. Na fa'afeiloa'i atu e le ta'ita'i o le sauniga le paia maua lava o le sauniga, i paia

fa'aleekalesia, fa'alemalo, fa'aleatunuu, i ona sa ma faiga, i le suafa manumalo o Iesu Keriso, le ao o le ekalesia. Ona usuina lea o le pese muamua. E ese foi le matagofie o viiga o le Atua na saunia e le aufaipese a Amanave.

Ona tu'uina atu lea o le avanoa i le ekalesia mo se latou molimau i le filifiliina o le latou faife'au. Ona saunoa lea o le afioga i le ta'ita'i tiakono ia Taula Nialama Taifane e fai ma sui o le ekalesia. I lana molimau, na latou saili lava i le Atua, i lana fa'asinomaga, ma lona finagalo, ona tali mai ai lea o le Atua. Ona tu'uina atu lea o le avanoa i le faifeau i sana foi molimau i le valaauina o i la'ua. O le molimau a le faifeau o Sasa, o le upu moni sa lagona lava e i la'ua lo la fa'atauva'a ina ua affio atu le paia o le ekalesia ma le valaau. Sa ia i la'ua lava se naunautaiga, ia fa'aaogaina so la vaivai mo le Atua ma lana galuega. Ona la taliaina lea ma le fiafia o le savali ma le valaau atu o le ekalesia i Amanave.

Ona fa'apaiana lea o le osigafeagaiga e le Ta'ita'i o le sauniga, ina ua fai le la ta'utinoga i luma o le Atua ma le fa'apotopotoga. O le upu moni lava o le alofa tunoa o le Atua ua valaauina ai i la'ua i le galuega. Ua saunia fo'i e le Atua le potopotoga i lena aso. Na i ai le pulega, matagaluega, le ekalesia aoao, o aiga, itu tetele ma itu taulagi, o e na faimalaga mamao mai i atunu'u i fafo, ma le vasega o faifeau na vasega fa'atasi ma Sasa i Malua. Na fai uma i latou ma molimau o lena osigafeagaiga. Ua fa'aapa atu le ta'ita'i o le sauniga, "Ia ia te oulua le filemu ma le manuia ma le alofa tunoa o le Atua." Ona fai lea o le la ta'utinoga. Ua la talitonu i le Atua lava e to'atasi, o le Tama le Alo ma le Agaga Paia. Ma ua la talitonu foi, o Iesu Keriso, o lo tatou Ali'i ma lo tatou Fa'aola. Ua la talitonu fo'i i le Tusi Paia, i le Feagaiga Tuai ma le Feagaiga Fou ua lava lelei lea e maua ai a'oa'oga uma o le fa'aolataga e fa'avavau e ala i le fa'atuatua moni ia Iesu Keriso. Ua la talitonu foi ua valaauina i laua e le Atua la te

EKALEsia FAAPOTOPOTOGA	KERISIANO AMERIKA SAMOA
tausi i lenei ekalesia ma lenei aulotu ma lenei fa'apotopotoga. Ua la folafola atu foi la te faia le galuega ma le fa'amaoni, ma talai atu le finagalo ma afioga a le Atua, ma la ta'utino atu, o le a la tausi i sakalameta ma le fa'amaoni. O le a fai foi i la'ua ma leoleo faamaoni o le lafu mamoe. Ina ia ola le aulotu i se olaga fa'ale-Atua, ma saga faamatagofie ai pea le ola fia auauna mo le Atua. I le fesoasoani mai foi o le Agaga o le Atua e mafai ai e i la'ua mea uma, ma la loto tetele ai pea e fa'ataunu'uina lo la valaauina. Ona ta'utino atu lea o le ekalesia ma le fa'apotopotoga ua latou taliaina Sasa ma Tuae fu e fai ma a latou Faifeau ma o le a latou fesoasoani foi ia i laua i mea uma e manuia ai le galuega. Ona faia lea e le Faifeau Toeaina, Iakopo Seumalo, le tatalo fa'amanuia. Ona folafola atu lea e le Ta'ita'i o le sauniga, ua fai Sasa ma Tuae fu ma Feagaiga a le nu'u o Amanave, i le Suafa Manumalo o Iesu Keriso lo tatou Ali'i Fa'aola. Ona susu atu lea o Faifeau Toeaina Aila Patea, Faifeau Toeaina Iakopo Seumalo, Faifeau Toeaina mai Malua ua le maua lona Suafa, ma le Faletua ia Pitovao Fa'ata'a, e fa'atalofa ma fa'amanuia atu i le susuga i le Fa'afeagaiga. Ona faitauina lea o le Tusi Paia e le Faifeau Manuele Mata'afa, ae tatalo le Faifeau Iese Fa'avaoga. Ona lauga lea o le Faifeau Kautoa Moloti i le Tusi Faitau o le Aso, Isaia 49:8-18. Matua: f. 8: <i>"O lo'o fa'apea ona fetalai mai o le Ali'i, o ona po o le alofa ua ou tali ai ia te oe; o le aso e fa'aolaina ai ua ou fesoasoani ai ia te oe; ou te leoleo fo'i ia te oe, ma a'u avatua oe e fai ma feagaiga a le nu'u; ina ia fa'aeaina le lalolagi, ia faia nu'u ua fa'atafunaina mo latou tofi."</i> Manatu autu: <i>O le mealofa o le alofa fa'avavau (The gift of everlasting love).</i> O ni upu ia o le lauga o lea aso. O le fa'aeaea lena a le Atua i le tagata. O lana mealofa o le alofa e fa'avavau. E le o se alofa e fa'apa'itau pe fa'apito, a o le alofa e tumau, e	le liu e fa'avavau. Ma e le tu'ulafoaina e le Atua lana auauna ua ia filifilia mo lana galuega lavea'i. E tapena e le Atua lana auauna ua ia filifilia. O le Atua e tali mana'o, e tali mai i le alofa i le tagata ua mana'omia le ola sa'oloto. E fa'aeaea i le tagata ua manatu ua tu'ulafoaina o ia. O le Atua na te fa'amalosi mai i lana auauna ia toa lona loto i le momoliina o le fe'au o le fa'aolataga. E fa'amaoni le Atua i lana osigafeagaiga. Aua e pele lana feagaiga i lona loto. Na ia foaina mai ai le Mesia, o lana feagaiga, ma lana mealofa o le alofa, ina ia fa'aolaina lona nu'u. O le mealofa lava ia a le Atua e fa'avavau. Ia fa'a-lesu mea uma tatou te faia. Ia amio lelei ma fai le amiotonu a le Atua. Ae peita'i, ua le fa'amaoni le Isaraelu i lana feagaiga ma le Atua. Ua leaga le quality o le ola o le fanauga a Isaraelu, ua le usita'i, ma ua oona a latou amio. Ua le tausi i latou i le feagaiga na osia ma le Atua, ua fa'atafeaina ai i latou i Papelonia. Lau susuga i le faifeau, o se mealofa a le Atua, ua valaauina ai ouluea, e fai ma ana auauna. Aua e fa'amaoni le alofa o le Atua i lana fanau. Ma e le tu'ulafoaina foi e le Atua ouluea, o lana fanau. Ia lua onosai i le galuega a le Atua. Ma ia lua iloa, o lo'o mafutaina pea ouluea e le Atua. Ia tu'u uma atu le lua ola ma le lua soifua mo le galuega a le Atua. O le galuega a le Atua, e le saili mamalu, e le fia alu ese mai le finagalo o le Atua. Ia lua onosa'i i le feagaiga na lua osia i luma o le Atua. Onosai i faigata ma tiga o le galuega. E manaomia foi le mafanafana o le pai mai o le Agaga o le Atua i a tatou talosaga faifai pea i le Atua. Galulue fa'atasi, saili le alofa o le Atua e fa'avavau, e manuia ai le galuega. Le paia e i aiga, le nu'u, ma le ekalesia i Amanave, fa'afetai tele, ua tali mai le Atua i a outou talosaga faifaiepa. O lea ua mu la outou taulaga. Ia saga fa'amanuia pea le Atua i le soifua ma le ola auauna o lau susuga i le fa'afeagaia ma le faletua. Saunia Gatai Patu AKF

“Sauniga Lotu Mafutaga Tina Matagaluega Sisifo”

O le aso 23 o Aperila, na faia ai le sauniga lotu a le Mafutaga Tina o le Matagaluega Sisifo. O faiga masani a le Ekalesia aoao, e tapena ai Matagaluega ta'itasi mo le sauni ai i lana Fonotele. O lea sauniga na amataina i le 8:00 a.m i le Ekalesia i Malaeloa. Na ma'ea le sauniga, ona faia lea o le malu o le taeao, na tapenaina e le Ekalesia i Malaeloa mo lea fa'amoemoe. Na soso'o ai lea ma le latou fonotaga, e talanoaina ai nisi o mataupu mo le Fonotele a le Ekalesia aoao. Na matauina le to'atele o tina o le matagaluega, na auai fa'atasi i lea fa'amoemoe.



O le faletua o le susuga i le toeaina ia Tony Hollister, na saunoa e fa'afetaia le mamalu o le Mafutaga Tina i lea aso. O lana saunoaga fa'atina mo tina o le Matagaluega i Sisifo, ina ia fa'amalolosi mo le galuega. A o sauni ai e penisione ma malolo mai lo laua fo'i soifua tautua mo le Atua ma lana Tala Lelei. O le agaga fa'afetai lea i le Atua, ona ua taunu'u i le manuia fa'amoemoe o le Matagaluega i Sisifo. O lana puipuiga ua sao ma uli ai le fa'amoemoe o lana fanau.

Saunia Charis Sao

FONOTAGA MATAGALUEGA SISIFO

O le fa'amoemoe ua taunu'u, o le la'au o le soifua lea. O le fa'amoemoe o le Matagaluega i Sisifo na fa'ataunu'uina i le aso 22 & 23 o Aperila. Na amata le sauniga a le Mafutaga a Tina i le aso 22 o Aperila, ona soso'o ai lea ma le Fonotaga a le Matagaluega i le aso 23 o Aperila. O lea fa'amoemoe, na amataina i le sauniga lotu na ta'itai'ina lea e le susuga i le feagaiga ia **Alama Solofa FS**, mai le Ekalesi i Vailoa. O lea sauniga lotu, na faia ai ma le Fa'amanatuga. O le fa'amoemoe fo'i mo lea aso, na fa'apa'iaina ai ma tofiga mo ti'akono fou o Pulega ta'itasi a le Matagaluega i Sisifo.



E le uma pea le agaga fa'afetai i le Atua, ma le molimauina o lea aso. O le soifua galulue o tagata e ofoina e auauna le Atua ma lana galuega. E silia ma le 20 ti'akono fou na fa'au'uina i lea aso. O le fa'afetai la i le Atua, ona o se manatu ua tupu a'e ia i latou ua ofoina le ola e auauna mo le Atua ma lana Tala Lelei. Ina ua ma'ea le fa'au'uina o ti'akono fou, ona soso'o ai lea ma malu o le taeao. Ona soso'o ai lea ma le fonotaga a le Matagaluega, e talanoaina ai mataupu mo le Fonotele. O le susuga i le toeaina ia Tony Hollister, na saunoa e fa'auma ai le fa'amoemoe o le Matagaluega a Sisifo. Na ia saunoa fo'i e fa'amalosia'u mo le Matagaluega i Sisifo, ina ia fa'aauau pea galuega lelei ua faia mo le Ekalesia.

“O le Uta Faaperofeta ma le Vaitau o Faaatali” – Mataio 20:1-16

Vaitau ma lona Faatali

I le masani a le atunuu, e tofu le vaitau ma lona faatali. O le vaisua e tapena ai le faatali mo le isi vaitau o le a sosoo mai. E masani le atunuu e le ose mea itiiti le “*vaitau ma lona faatali*”. E fetuunai mea uma, o le fagotaina o le sami, o le faiga o taumafa, faapea ma le fefulisa’iga o mafauauga ma le tōfā saili. E fua le lelei o le faataliga o vaitau, i le lelei o le fuamatagi.

O le fuamatagi tasi lea tomai a le atunuu sa iai, e pei e foliga o se “uta faaperofeta”. E lua mea taua i le tagata fuamatagi. Muamua, e “faitau matagi”. O le taumafai ia iloa ona faitau tupuga o matagi, o mata o matagi, o i’u o matagi, o to’aiga o matagi, ma asaga o matagi. Lua, e “faailomatagi”. Nate faaaogaina aga o le sami, o manu, o ao, o laau, ma fetu o le lagi e faailo ai le fofou mai ma le lolo’u o matagi. A pepe le manu o le atafa, lona uiga ua faitau afā. A. tetele le puta ole galu ma pu’e galu mataloloa (galu ua pu’e mauululuga), lona uiga ua lalata le Matagi Toga. A mamago tino o tagata ma meaola, ma tafe tetele le auau peau ma sologa peau, lona uiga ua lalata le La’i. A tele galu mataninii ma taoto le aupeau, lona uiga ua agi le Matāupolu. Lona uiga e le masani le atunuu i le tāmāu i le “*mea na sau a’i*”. Aua e tofu le vaitau ma ona uiga ma ona matagi. E tofu foi la le vaitau ma lona faatali. E pei lava ona faatali le fuata fou ile le toe tapena o le isi lou fou.

E iai vaitau iloga o le atuuu. O le “*vaitau ‘efu*”, lea foi e ta’ua o le tu’i’efu (*dry season, drought*), o le vaitau lea faimai e fiu e tu’i le ‘oso e lē pū le palapala aua ua mago ma ‘efu. E fiu e asu i luga le palapala e toe to’ulu palapala i le pū. Lea e afua ai ona ta’u le isi masina o Samoa o le *Lotuaga*, aua o le vaitau o le tatalo ma lotu ia tō ni uaga. O le vaitau foi lea e matuā mago ma pala ai le fā o le talo, lea e afua ai ona ta’ua le isi masina o Samoa o le *Mulifā*.

O le “*vaifau oge*”, o le vaitau lea e masani ona sosoo ma le vaitau ‘efu, e tua ai tagata i ufi vao aua ua oge talo ma ‘ulu. O le “*vaitau afu*”, o le vaitau ua lelei le mea’ai. Faimai e afu ai ufi, o le faailoilo lea ua lelei taumafa, e oso ai le Lo ma i’a a’e a nuu armaise e tetele ai foi le lupe. Lea e mafua ai ona faaigoa isi masina o *Lo aemaise* o *Oloamanu*, o le masina e olo faalausosoo ai le lupe. O le “*vaitau afā*”, o le vaitau faimai e tetele ai timuga ma oso matagi lea e afua ai ona ta’u isi masino o *Palolomua* ma *Palolomuli*, o le vaitau o le oso o le palolo. O lo matou nuu i Sataua i Savaii, e amata ona tapena le faataliga o le palolo ia Aukuso. E amata ona tapena a’a ta palolo, e uumi o latou si’usi’u e faainuina ma ta savali ai le palolo. E tapena ai le sufiga o le palolo, e pei o lenei solo.

Tai o masina atoa, tai o fe’etetele

*Tai o sulutele ma le fanaeleele
Inumia le eleele, o le vao alaga
Pe ta te usunoa na o salefu, usuia matusaga
Le taāga ua tetele, tofusua lo’u gafa.*

A silasila lelei, e ala ona tapena lelei le faataliga o le palolo, ona o le i’a sa asi ai gafa. Ua sola le palolo mai i le tele o nuu e pei o Sataua ona ua faatau. O le vaitau foi lea e masani ai ona nunu le to’au o ufi, e pei o le masina e ta’ua ole *Aununu*.

Ma le “*vaitau mau*”, o le vaitau faimai ua totogo le moemoe ma le ‘aputi o le fuata fou, o le faailo o le tetele o le mau. Lea e afua ai le upu, “*ua ‘ai ulu tuantai ta’isi*,” aua ua le toe fia ano nisi ini taisi ufi vao, ae ua tapena uma tagata e faafeiloai le fuata fou. O le taimi o le faafetai ma le ‘ailao o meaalofo a le Atua, lea e afua mai ona ta’ua isi masina o “*Taumafamua* ma *Toetaumafa*”.

I le mau a le atunuu, e faatali soo se vaitau. E eseese vaitau. Ma e eseese foi faatali e fai iai e fua i lona natura. Afai o le vaitau oge, e amata ona faamafu meaai. E fai le masi ‘ulu ma masi fa’i i isi nuu. E totō ia lava pu’e ufi. E faailoga pupu taamū vao ma ufi vao e tua iai. E tele nuu i Savaii e masani i le tapena lelei o to’agāfale i le va o le ‘a’ai ma le vao e to’a iai tutuliga o puaa ‘ai vao. O nisi nuu e ofe vai, e faasua tane ofe ma tata’i alavai. O le matou nuu i Papa Sataua sa faifeau ai le Toeaina o Reupena ma le faletua ia Simolo. E iai le meaalofo a le toeaina o le faitau o vaitau ona fua lea iai o le faatali. Ou te manatua, e iloa lelei e le toeaina o le a agi se afa e faapotopoto tagata i le falesa mo le tatalo ma fai ai faatonuga o mea e tapena.

O le tele o nuu e faamamalu faasao poo sa faasapati o le eleele ma le sami e tua iai le nuu i le taimi o le oge. Lona uiga, o le sa faasapati e le ose mea fou ia Samoa. Pei lava o le sapati i le Tusi Paia, e sa le eleele ma le sami ona tagofia mo se vaitaimi ina ia tuu le avanoa e toe tatupu. O le taimi nei, ua tau leai se taua o le “*vaitau ma lona faatali*”. O le “uta faaperofeta” o le atunuu e iloa fetuunai ma faitau faailoilo o mea o le a tutupu, ona fua ma tapena lea iai. O lea tomai e taua tele i le galuega faafaifeau, o le tomai o le faitau o faailoilo (*reading the signs of time*).

O le Tusi o Vaitau

O le faitauga o le Tusi Paia e tai pei lava o le “*vaitau ma lona faatali*.” E fua ma fetuunai le feau e faatali ai le vaitau. O le pogai lea e afua ai ona lē tataua ona iai se “feau tāmāu” ose tala o le Tusi Paia. aua foi e lē tataua ona “tasi se feau”. Soo se “feau tāmāu” ua na tapē le matalasi o le Tusi Paia. Afai o le Tusi Paia o le ‘tusi ole ola’, lona uiga e pei o uiga o le tai ma le masina. E gau atu le isi feau ae te’i mai le isi. E fano atu le isi ae fana’e mai le isi e faatali ai le vaitau fou.

E masani tele le aufailotu i le gagana lenei o le “mea na sau a’i”. Aua foi o lea fuaitau, e pei e foliga ua faataua le tāmāu pea i le mea tuai sa lagolagoina ai e na muamai. E tataua lava ona faalogo mulimai ia muamai. Peitai o nisi o taimi, ua avea foi lea fuaitau ma ala ua taomia ai le tomāi o tupulaga e faafae ma taitai se aiga, Ekalesia, ma se nuu. Ua tapē ai le ofi o le Agaga o le Atua o Vaitau e tapena ai le Ekalesia ma le aufailotu mo vaitau eseese.

O se faaitaiga faigofie o le “mea na sau a’i”, lea e fai soo e le aufailotu, lea e ta’ua o le “lauga faafaga” poo le “microwave sermon”. O le “microwave sermon”, na ona faafaga lava ose lauga tuai sa tuu’aisa, ma toe laulau i le aulotu i le aso Sa, aua ua augata le faifeau e tapena se feau fou. E iai le isi aoao na matou aooga, a matou malaga i faaipoipoga ae valaaulia matou ise felaugaiga, e pisi uma aoao e tapena lauga, ae tōfā lelei lava le aoao lea. A fesili atu iai po ua tapena sana lauga o le felaugaiga, ae faimai, “e le o iloa lava e aulotu o le mea tuai, aua na ona toe fulifuli ā, pei lava lea o le mea fou!”. E iai le pese a le Ekalesia Metotisi, “etaua pea le mea tuai”, peitai e le’o mea tuai uma foi e sa’o ma fetāui e tau talitali ai vaitau ma ona matagi. Ua sui vaitau. Ua faaopoopo foi isi vaitau fou. O le lu’i mo le Ekalesia, o a ni faatali fou mo vaitau o foufou mai?

Faato’a le Tala

E masani na lauga le tusi nei o Mataio, e muamua pupū le failauga e faatusatusa le matai i le Atua. o lea faiga, ua tuu ai le faamamafa i le matai (employer) lea ua faatusa i le Atua, ae faase’e tuāgalu isi tagata o le tala. O nisi ua latou faatusa e na muamua usu i le taeao, o tagata lutaia. Ao i latou na mulimuli ua faatusa o tagata o nuu ese. O lea faiga e le gata e le maua i le faamamafa a Mataio, a ua faamalosiā ai foi le tā-tagata o lauga. E leaga tagata lutaia na usu muamua, ae lelei taata o nuu ese na usu mulimuli. O nisi ua faatusa le auauna a le matai i faifetau poo le Ekalesia. O nisi foi ua faatusa le totogi na tufa ile gagaifo o le aso, a le faamasinoga a le Atua. o lea faiga ua vave ai ona fuli le tala e faamamafa le toatama’i o le Atua pe a oo i le faamasinoga mulimuli, e tuu eseese ai tagata lelei ma leaga.

O nei faatusatusaga, ua “gasu ma lavelave” ai le feau ole tala mo aso uma. Aua ua tatou puniloa le matalasi o le tala. I lea foi faiga, ua tatou aveese le tala mai le soifuaga o aso faisoo. Ma ua le maua ai le taua o itulagi eseese o le tala, e pei o le itulagi o tagata faigaluega (*contracted employees*), o tagata su’e galuega (*job hunters*), o le maketi (*market system*), o le tamaoaiga i lena vaitau (*economic system*), o le itulagi o le fanua (*ecology*), aemaise o faaseā ma fesili taua o loo i totonu o le tala (*economic critics*).

E taua le taumafai e “faato’a le tala” (*clearing the*

story). A faato’a se fanua, e taumafai e aveese le “gasu ma le lavelave” o le vaotā ina ia ola le to’aga fou. Ua ola tetele le vaotā o faauigaga faakolone ua punitia ai le manino o le tatou vaai i le matagofie o itulagi eseese o le tala. Tatou te fafia e apo faauigaga faapulega malosī (*power and authoritative interpretations*), e faaoga ai le Tusi Paia e lagolago ai o tatou pulega faafaifeau, ae galo ia te i tatou, o le tele o faataotao e matua faatītō lave e Iesu faiga faapulega malosī.

E taua le toe faato’a lelei. Auau ese mea o punitia ai le vaai i le tala nei, o se tala e tautala mai mo le Ekalesia ma aoaoina ai foi i tatou le aufaigaluega. E mafai ona fai i tatou ma mati. E mafai foi ona fai tatou ma ē na alausu muamua. Poo ē na faafaigaluega mulimuli. Poo le auauna foi e pule. Sei tatou asiasi ia i le tala.

O le Vaitau Oge

O le faataoto nei, ua toe. Faatepa ai e Mataio le tagata faitau i foliga o le “vaitau oge”, aemaise mafatiaga e feagai ma e matitiva. O le vaitau o le faigata ona saili se mea e tua iai ‘aiga. O tagata faigaluega pei ona ta’ua i le faataoto, e pei o le “tagata faatali timu”, pei o le upu e fai i Aopo. O le faatali timu o tagata matitiva i le taimi o Mataio, e faatalitali ma momoo poo afea e pa’ū ai se uaga o manuia i taimi o le oge. E le gata i le tausiga o ‘aiga ma le faataunuuina o taulaga e pei ona faatonu e le tulafono lutaia, ae o le tologiina o lafoga i lalo o le pulega a Roma. O le “vaitau oge”, e le na o le oge i le tupe. O le oge pito sili, o le leai o se mea e tua iai. Ua ola faamoemoe i mea uma, lea e ta’ua e nisi, o le “*dependency syndrome*” poo le faamoemoe e ui lava ina tele elele e galueaina, ae ua manao lave e faamoemoe i isi. Ua tele le ituaiga ofe lea i Samoa. E tele elele, ae faamoemoe lava i tupe lafo mai i fafo e ola ai.

I le “vaitau oge”, e faatonu ai e le tulafono lutaia le matai faitovine e tataua ona totogi le tagata faigaluega pe a uma galuega o le aso (*daily wages*). O le tulafono, “aua ne’i tuua pea ia te oe seia taeao o le tau o le ua faia lau galuega” (Levitiko 19:13). O le isi faamaninoga o lea tulafono, “ia e avatu ia te ia sona totogi i lona lava aso, ao lei goto le la; aua ua mativa o ia” (Teuteronomo 24:14-15). E tasi le tenari e mafai ona ola ai le tagata i le aso. A pa’ū ane i lalo, lona uiga ua telē le faafitauli. O le pogai lea, pei ona atagia i le faataoto nei, e laulaututū ai le toatele i le maketi i le aso atoa, e faatalitali galuega. E taua ia o le malamalama o le failotu i vaega nei, ina ia malamalama ai i tulaga o loo soifua ai le aulotu ma le Ekalesia. O le pogai lea o le taua o le uunai o kolisi faafaifeau ia aua nei aoaoina na o le Tusi Paia, a ia iai foi mataupu e faauiga ai le vaai a le faaleagaga a le Ekalesia i le tamaoaiga, polokiki, ma le soifua lautele. E le gata la ina vaai, ae tataua foi ona iai se leo faaperofeta o le Ekalesia i nei mea,

aemaise lava pe afaina ai tagata lautele, aemaise o eleele ma le sami.

E masani e sefulu itula i le aso e faigaluega ai le tagata, ma le oso i le goto o le la (Salamo 104:22-23). Pei ona ta'ua i le faataoto, o nisi na usu e faigaluega i le ituaso muamua (6am). Pau ia o i latou na iai maliliega tuugutu (*verbal contracts*), “o le aso male tenari” (f. 2). O isi na valau mai i le ituaso e tolu (8am), ituaso e ono (12pm), ituaso e iva (3pm), ma le ituaso e sefulutasi (5pm), e leai se maliliega tuugutu, ae na tuu ile faitalia o le matai ise “mea e tusa” (f. 4, 7). O matai o tagata maumea. E iai matai mau-fanua. E iai foi matai nonō-fanua. O matai nonō-fanua, latou te lisiina mai ni eleele mai ē mau-fanua e fai ai a latou tovine. E le o manino i le tala nei, poo se matai mau-fanua, pe nonō-fanua. Pau le mea o manino, o le matai e iai lava tovine ma ana auauna. Lona uiga o le tagata aloa'ia ma maumea.

Faailoilo o le Vaitau Oge

E iai le faailoilo o le “vaitau oge” na iloa ai e le matai, e ona faifaitetele le oge. O le faailoilo muamua, ua tele tagata su'e galuega ae ua le lava galuega. Lea foi e tupu i aso nei lea faafitauli, ua toatele le atunuu ae ua leai ni galuega. o isi aulotu, pe na o le 20% tagat faigaluega, ae o le toatele ua nofo fale. O Samoa i le taimi nei e tusa ma le 9.84% o le faitau aofai o tagata e leai ni galuega e tusa ma faamaumaga a le *World Bank* i le 2021. O Tutuila i le taimi nei pe afai o sa'o faamaumaga na maua mai i le *Department of Commerce, Statistics and Analysis Division*, e 7.3% (2020) tagata o le faitau aofai o le atunuu e leai ni galuega. O tagata su'e galuega e masani ona tumu ai le taulaga i aso uma. E usu i le taeao fua. O nisi e uma lava le aso e leai se galuega e maua. Lona uiga ua leai foi se meaai mo le 'aiga i lea aso.

O le faailoilo lona lua, o tagata nei na tutū i le maketi, toe ose aga ona pa'u'ū lea i le saofa'iga pito i sili ona maua, o “tagata 'aisi”, lea foi e tele ina faatatau iai isi faataoto a Iesu. o taga nei e vase ai le laina, oo loa i le “mativa 'aisi” poo le mativa lea e masani ona ta'ua o le “mativa saupa'u”. O le mativa toe lava na o le mea e pipii i le pa'u. A toatele tagata faapenei i se atunuu e vase ai le laina o le mativa, o faailoilo nei o le telē o le va o le mativa ma le mau'oa. O le faailoilo foi lea, ua amata ona fanafanau soligatulafono i se atunuu, aua pau lea o le mea e tua iai tagata i le matitiva.

Faataitaiga, i le suesuega a le *Lowe institute* i Ausetalia i lana ripoti o le 2022, o Toga, Fiti, Samoa, ma Amerika Samoa, o nofoaga nei ua pei ni malologa (*transit points*) ua to'a mai iai le malaga a fualaau faasaina, ona tufatufa loa lea i Niu Sila ma Ausetalia. O nei fualaau e auina mai i Amerika i matu, Amerika i Saute, ma Asia i Sasa'e. Ma o nei faiga ua faaolaola ai ma

soligatulafono faavaomalo (*transnational crimes*). Silasila i le faataitaiga o le faafanua oi lalo. E tusa ma le *American Samoa 2015 Youth Behavioral Survey*, e toatele nai fanau ua “faoa i le ta” i fualaau faasaina, aemaise lava i le Grade 9-12. O le pasene tele lava o fualaau o le methamphetamines (o isi ona igoa o le “speed”, “crystal”, “crank”, “ice”), o le cocaine, ma le marijuana (o isi ona igoa o le “K2”, “spice”, “fake weed”, “King Kong”, “Yucantan Fire”, “Skunk”, “Moon Rocks”). Mai i le 2,351, e 33% na faatau a latou fualaau faasaina i totonu lava o aoga o loo aoga ai. Afai o le 2015 lea, pe mata e faapei se faamaumaga o iai nei? O le “faoa i le ta”, o se manu'a ua fusia i le mūmū ma ua fufula ma lūgā. Pe le oni faailoilo o se oge tele? Ae poo le a foi se galuega a le Ekalesia o fai iai?

O le faailoilo lona tolu, ua leai ni matai faitovine e toe fia faafaigaluegaina ni tagata ona o le oge. Ina ua fesili le matai “se a le mea toe te tutū mai ai iinei i aso uma e leai se galuega” (f. 7), o le tali a le au su'e galuega, “e leai se na fai mai ia te i matou” (f. 8). Lona uiga ua leai se isi e toe faafaigaluegaina le tagata mativa. E mafai ona faapea, o faailoilo ia ua le lava galuega. Mo le tagata mativa saupa'u, poo le ā lava le galuega e maua, pe laititi le totogi, poo le ā foi le faigata, ae a maua ai sina seleni e tausi ai le 'aiga, ua lava lea. O le tamaoaiga faaletupe i le taimi nei, ua pei se fatāmanu, poo lea e ta'ua o le *Economic Pyramid*. E eseese ona fata ma ona paega. A toatele tagata i le paega pita i lalo (*Bottom of the Pyramid or BOP*) e fai ma “vae o le fata” e faatinoina “galuega taugofie” (*cheap labor*) ua lelei foi le tu a le fata. E lua natura o lea fatāmanu. Muamua o tagata nei e fai ma tulaga e tu ai le fata i latou ua. Lua o le fata e tafe agai i luga lona tamaoaiga, e le tafe agai i lalo. O le tele o mea o le foafoaga na faia e le Atua, e tafe agai i lalo e pei o le vai, timu, loimata, ma isi mea. Ae o le foafoaga faatamaoaiga a le tagata maumea, e tafe agai i luga. O le tele o atunuu o le Pasefika, o loo fai ma “vae o le fata” o le tamaoaiga o atunuu malolosi ma maumea. Ae iai foi fatāmanu i totonu o soo se atunuu. O le tele o tagata lautele, o loo fai ma “vae o le fata”.

“O LE FATĀMANU O LE TAMAOAIGA”

O le tele o tagata ua fai ma “vae o le fata”, e tiga ona latou iloa e 'aivale ma faomea tagata o le paega pito i luga o le fatāmanu, ae le faia iai se galuega. Pau le mea taua ia maua se mea e maua ai se 'ai o le aso. O faailoilo nei oni faigatā matuiā o le a oo mai. O le fesili, e mafai e le aufaigaluega ona faitau faaperofeta vaitau ma aga nei? Aemaise pe afai o nisi o le aufaigaluega o loo saofafa'i foi i le fata pito i luga o le fatāmanu o le tamaoaiga o se atunuu? E mafai ona e saofa'i i le pito i luga ae fai pea se galuega alofa ia i latou ua fai ma “vae o le fata”?

O Faatali Fou

E amata le tala, e faatusa e Mataio le mālō o le lagi i le *“tasi matai na alausu atu e tautala ma nisi e faigaluega i lana tovine ae tauu atu”* (f. 1). I le vaai a Mataio, e le o faatatau le mālō o le lagi i se nofoaga e mamao i le lagi. O le mālō o le lagi a Mataio, o le *“faia o le finagalo o le Atua i le lalolagi”* e pei o le tatalo a le Alii (Mataio 6:10).

Pei ona ta’ua, o le matai nei o le tagata o le paega pito i luga o le fatāmanu o le tamaoaiga o le nuu. Ae lei faia se galuega i le oge, o le mea muamua na fai e le matai, o le amatamea ia te ia. Tai pei o le fale ae atofuli. Ina ia puni uma matātutulu o le fale, e tataua ona aveese uma le lau tuai, ae sui le lau fou. I le vaai a le matai, a lē amata i le paega pito i luga le atofuli o le tamaoaiga (mai matai faitovine) mo ‘oto ese le lau tuai o le tamaoaiga, e toatele i latou e afaina. O le suiga pito i sili ona ‘anoa ma anagatā, o le suiga e afua mai ina ua mautinoa o loo iai lo’u faaletonu. Pei o le upu, soo se mulumuluga aufoe, ia vaai muamua lava oe i le au o lau lava foe.

E iai le upu e fai i le mauga, *“e sooa e le mauga ia lava”* (*the mountain repairs itself*). Ina ia mafai ona fesootai lelei ma lona siosiomaga, e amatamea lava le mauga e faatumu ona lava ta’e ma ona āvaāva. O le mafuaaga, o le mauga e faatali timu mo le vanu ma laau oi lalo ane o ona vae. O ia o le malu ma le paolo mo mea uma oi lalo ane. Masalo o le mafuaaga lea o le mau a le atunuu “e afua mai mauga manuia ose nuu”. E sui mauga ina ia malu vae o le mauga. I le tala nei, o le talitonuga o le matai, a sui ia, e ono fai o ia ma sulufaga e malu ai e oi lalo o lana vaaiga. Ao le faamoemoe autu o le sui o ia, ina ia fuli ma sui le “mea na sau a’i” le tamaoaiga ina ia mafai ona toe faaleleia. O le tala nei, o le lu’i mo taitai o le atunuu, Ekalesia, faigamalo, aemaise o ‘aiga. E le mafai ona tatou fofōina le oge, pe afai o iai nisi o oge ia te i tatou. E le mafai ona tatou lauga le alofa, pe afai o loo fai nisi ma “vae o le fata” tatou te fepe’ei ai i luga. O suiga la nei na fai e le matai e faatali ai le vaitau oge.

Faatali 1: lolo’u le lagi

O le faatusa o le malo o le lagi i le *“matai e alausu e tautala ma le aufaigaluega i le tovine”*, ua faatu lava e Mataio i le amataga le eseesega o le malo o le lagi e fau i le alofa, e tafe agai i lalo le tamaoaiga, ma le malo e fau faafatāmanu e tafe agai i luga le tamaoaiga. I le *“mea na sau a’i”*, e lē savali ma alausu se matai. E lē savali se tagata aloa’ia e su’e ni tagata faigaluega. O le galuega lena a le auauna (f. 8). Peitai, i le tala nei, ua lolo’u le lagi o le matai. Ua tu le matai ma savali. O le lolo’u o le lagi i le aganuu a Samoa, o le fa’i mai o mamalu o se tupu e usugafa ise tagata e lē tau tupu sona gafa, lea foi e ta’ua o le “lagifelouai”. Poo le fa’i mai o se pou o se tamalii, e saofa’i i le pepe o le fale ae faavagavaga le tala o le maota

aua le isi tagata. O le lolo’u o le lagi, tasi lea aga na iloa ai tupu ma tamalii. E iloa le tamalii i lana tu ma lana nofo.

A faalogo iai le tagata Iutaia i lea vaitau i le faataoto nei, e faate’ia. Aua e lē masani ona savali ma lolo’u se lagi o se matai faitovine. Ae lē tasi ona savali. E faalima lelei ona savali le matai, seia oo lava i le ituaso e sefulu ma le tasi (5 pm). Pau le galuega a le auauna na fai i le tala nei, o le tufa o le totogi a e na galulue. Ao le tofi tonu lea o le matai. Peitai i le tala nei, ua fuli tofiga. Ua auauna le matai ae matai le auauna. E anoa atu le savali e leai ni upu, nai loo upu e leai se savali o isi. O le tele ia o faataoto a Iesu. E uma ane, ua fuli ai tofiga ma matafaioi. E faatitō ai e Iesu le aganuu o lona taimi, e tuu ai i lalo le fata pito i luga, ae tuu i luga le fata pito i lalo.

E telē le lu’i a le tala nei i le aufailotu. E tele o tatou faalupega ua fai e le atunuu. O faafeagaiga. O tamasā. O le au le faaelele. O ositaulaga. O lupefaalele. O nei faalupega o faaeaea a le aganuu. Ae o faalupega foi nei ua tele ina faase’e ai i tatou, ma aveese ai le ute o lo tatou valaauina, o auauna. I le tala nei, e mafai lava ona tatou auauna, tusa lava pe fai ma matai. A o ou laititi i Savaii, e masani ona ote lo’u tina, *“e lē faia se tuiga i le umukuka.”* Lona uiga, soo se tagata e tofi i le umukuka, pe matai, faifeau, poo le a lava, e aveese lona tuiga ae tago i le sasa’e o le umu, tulou. O le tagata ua tofi e taitai, e le toe su’ea sona pou. O lona pou, o le tautua o le aiga ma le Ekalesia.

Faatali 2: lafo maia lou faatuatuaga

I le “mea na sau a’i”, e fai maliliea tuugutu mo le augaigaluega uma o tovine. O le faamoemoe, ia malu faaletulafono le matai faitovine mai se tagi i se faamasinoga. Lona uiga a leai se maliega, e mafai lava e se isi ona ave le matai i le tulafono. I le tala nei, o le matai lava na ia malie e leai se maliega e fai. O le faamoemoe, ia fai se faiga fou e ola ai le isi tagata. I le tala, na o le tasi le maliega tuugutu na fai. Na o i latou na valaauina muamua. O isi na mulimuli mai e leai ni maliliea tuuputu. Ae na fai i se *“mea e tusa”* ma le finagalo o le matai. O le gagana lena o se *“mea e tusa”*, e lua mea e ono tupu mai. A lē gau le matai, e gau le tagata faigaluega. Peitai a tuu i fausaga faatamaoaiga i lena taimi, e seāseā lava ona gau se matai. Aua i lena vaitaimi, e tele sootaga o matai. E iai a latou uō ma tausoga i le faigamālō ma totonu o faamasinoga, aemaise totonu o le lotu. Poo fea lava e oso atu ai se tagi a le tagata faigaluega, e malo lava le matai.

Lea foi e tupu le mea lea i le taimi nei. Ua le malu le toatele ona ua sosolo a’a o sootaga ma faigauō i le mālō, Ekalesia, ma nuu. E iai le si’uleo i totonu o le tele o falefaigaluega: *“a iloa a’u nei, oute iloa foi oe taeao”*. Lona uiga, e lagolago e le isi le isi, tusa lava pe soli ai ma le tulafono, ao le mea tāua ia maua ai se manuia. Ua

EKALEsia FAAPOTOPOTOga	KERISIANO AMERIKA SAMOA
faamallosia e lea mau iga “faatogafalea” poo lea e ta’ua i le faaperetania o le “<i>corruption</i>”. O le “faatogafalea”, ua uma ona silatoga ma filitoga le ‘aiga mo se faalavelave, ae toe sui faananā mulimuli ona oni femusua’iga i tua. Ua popoto le toatele i aso nei e sui faananā ma faasolitulafono mea ua uma ona papae lelei ona faavae. O le faamoemoe ia maua ai se mea faasili mo ia. A lelei lava sa’u ua i totonu o le faigamalo, Ekalesia, ma nuu oute musumusu iai, ua sao foi le togafiti. I le tala, e fai si malosi o le tu faatogafalea i le taimi o Iesu. Lona uiga, o le ola atoa o i latou na mulimuli mai, ua i aao o le matai. Ina ua faiatu le matai e totogi i se “<i>mea e tusa</i>”, e tutusa lava ma le faiatu o le matai “<i>lafo maia lou faatuatuaga</i>”. Masalo o le mea foi lea na fai e i latou na mulimuli mai. Ua lafo lo latou faatuatuaga i le matai, e le o se tagata e togafalea lona mafaufau. O le faatuatuaina lea ua moomia i taitai o le atunuu, Ekalesia, ma nuu. O se taitai e tau’au ma tafataga iai le tagata vaivai ma mativa. Aemaise oi latou ua uga’oa ma iloga ai le sasa a pulega faatamaoia. I le taimi nei, e pei o faiga palota a le atunuu, o le toatele o sui ua uma ona tautō i le itumalo “<i>lafo mai lou faatuatuaga</i>”, ae galo lava lea tautoga i le taimi e sapai ai manuia o le tofi. Faatali 3: fua faatatau ae le o le fuapau I le “<i>mea na sau a’i</i>” e fua le totogi i le galuega. Ia tutusa le totogi ma le galuega na fai. I le tala, ua sui le “fua o le totogi”. Ua le fua i le galuega, ae fua i se “<i>mea e tusa</i>” ma le finagalo o le matai. Ua “<i>telē le totogi ae laititi le galuega</i>”. O A’U e 68 le aofai o tagata faigaluega oute vaaia i le PTC. Ua uma ona lomua lelei tulafono o le taimi faigaluega ma le taimi manava e fua i luga o tulafono o leipa a Fiti. E fua le totogi i le taimi ma le galuega na fai. Peitai i le tala nei, e ese lona fausaga. O e na sefululua itula na faigaluega ai, ma i latou na o le ta’iiva, ta’iono, ma le ta’itasi na faigaluega ai, ua tutusa uma o latou totogi. E foliga mai la o lea e gau le matai, pe a vaai mai i le itulagi faatamaoia. Ae le o se tamai gau. A tuu i le tala, na o le tasi le vaega na totogi sa’o, na o le vaega na muamua. Ae fa isi vaega na totogi faasili ae laititi le galuega na fai. Lona uiga ua telē le tupe ua alu, ae laititi le galuega ua fai. E le o se taiala lelei faapisinisi lea mea, auā a tuu i taiala faapisinisi i aso nei, e leai se pisinisi e ola pe a apo lea taiala. Masalo o le mea lea e tele ai ina gau nai pisinisi laiti e fai e o tatou tagata, auā e le tausisi tele i le taiala faapisinisi, ona o le manatu i le aiga ma le Ekalesia. Peitai, taatia ia lea gagana o le gau, auā o le gagana faapisinisi. Ae taua le vaai i le mea fou ua fai e le matai pe lelei pe leai. Ui i lea, e iai le taimi e lē taotasi ai i le fua ua faatonu mai e le tulafono poo le tamaoia, ae fetuunai le fua e fua i luga o le vaitau ma ona manaoga.	Tāua ia o le fua lea faavaitau. Masalo na iloa lelei e le matai, e tele manaoga o tagata faigaluega na mulimuli mai. E iai o latou ‘aiga e tausisi, o lafoga, o taulaga, poo ni ‘aitalafu foi. Auā e iloa e mata le loto ua masofa ona o le mativa, ae i loa e le loto e alofa. O le malo o le lagi, e faamamafa le “fuafaatatau” (<i>equity</i>) e fua i mana’oga ma le malosi o tagata, ae le o le “fuapau” tutusa o tagata uma (<i>equality</i>). E masani le tagata e pulea taumafa i le “fuafaatatau”. A faapea e toatolu tagata (Seve, Simi, Siaki) ae sefululua eleni e fia faasoa, e masani a “fuapau”, e tofi le toatolu ma le ta’ifā eleni. Lona uiga e faatutusa tagata uma. O le fua foi lea ua tele ina faa’oga e Malo Aufaatasi (<i>United Nations</i>) ma pulega faaletupe i a latou fausaga ma faavae. Ua faatutusa atunuu tetele ma atunuu laiti i a latou fua faatamaoia. Lea foi e fai i totonu o aulotu. Ua faatutusa uma lava matafale tetele ma matafale laiti. O nisi o taimi, e tutusa saofaga a matafale tetele ma matafale laiti ae a tufa mea e tetele atu mea e ave i matafale tetele nai loo matafale laiti. I le agaga o le tala, na mulimuli lava le matai i le maliliea tuugutu, “<i>o le aso ma le tenari</i>” (f. 2). Lea lava na totogi ai i latou. Na mulimuli foi le matai i lana upu i e na mulimuli mai, na te avatu se “<i>mea e tusa</i>”. O le loto o le matai, soo se tamaoia e tataua ona vavae ona o le alofa. Ia taitaiina e le alofa le tupe, ae le taitaiina e le tupe le alofa. Ua tetele le oge i lenei vaitau ona ua tatou le iloa ona vavae o tatou tamaoia. Ua ola faaputu le tagata ia mo ia ona o lana lea aiā tataua. O le pogai lea ua faigaluega ai le tagata mo le tupe, ae ua le faigaluega le tupe mo le tagata. O le upu a le matai i e na faitio, “<i>e te faauu mai ea ina ua ou agalelei</i>” (f. 16). O le upu a le atunuu e fai i le tagata faa’u’u o le “faasi’ugutua”. E faaali mai e le faasusumu o gutu ma le manuminumi o foliga le ita o le loto. Ao isi foi tagata e poto e teu le faa’u’u. Toe Upu O le tatou faiva, e le na o le faitau o le Tusi Paia. O outou foi o perofeta. O lo outou faiva o le faitau o vaitau ma tapena faatali mo nuu. E taulamua i tatou e faama’ite faatali fou ma lelei. E tapena mo le isi vaitau e ala i le iloa ona faitau faailoilo o mea o loo tutupu i le taimi nei ina ia aua nei afaina le nuu. O na tapenaga e faavae uma i le Atua alofa. O le fausaga faavae lea o le Ekaleisa, o le alofa. Ia saili le mea o iai le alofa ma tuu iai sona fati ia pepese ai le Ekalesia. Ma ia manatua o le fua a le malo o le lagi, e le manuia ai se tagata maumea. E le mamalu ai foi se tagata mapo mamalu. Leaga o le fua e feūa’i e faavae i le alofa. A fia maualuga ia iloa maualalo, a fia muamua ia iloa ona mulimuli. O le fua nate lu’iina o tatou faalupega ua faaee e le aganuu ma le Ekalesia. O le fua e taua le toe silasila iai, pe afai o oe ma a’u o faifeau ua valaauina e tu mo le amiotonu a le Atua. Soifua!

LISI O LE 'AUFAGALUEGA AGAVAA MO LE GALUEGA TAUSI 'AULOTU

O le lisi lenei o le 'Aufaigaluega i Faifeau Samoa (FS) ma A'oa'o Kanana Fou (AKF) o lo o avanoa ma agavaa mo le galuega tausī 'aulotu. Ua saunia lenei lisi ona o le finagalo a le Fono Tele (FT:16-26), e fesoasoani ai i 'aulotu o lo o tau saili ni o latou Faifeau. O suafa ia, e le gata o le 'aufaigaluega o lo o galulue nei mo le Ekalesia Aoao i Kanana Fou ma le Ofisa Tutotonu, a o latou foi o lo o galulue fa'amaoni i tua i 'aulotu ma Pulega e pei ona tu'uina mai e Failautusi o Pulega. Afai e i ai se faigaluega agavaa e le o i ai lona suafa i lenei lisi, ia fa'afesootai mai le Ofisa a le Failautusi Aoao i le imeli: gensec@efkas.org, e fa'alauliloa ai lou suafa i le taimi e toe lolomi ai le Lamepa.

Ofisa Failautusi Aoao

Tupuivao Ioelu FS
Tamilo Palepua AKF

Ofisa A'oa'oga Kerisiano:

Setefano P. Lefale FS, *Fa'atonu*
Vili Polikapo FS
Penani Lefaoese FS
Ronald Tuimauga AKF
Magaga Talo AKF
Vagana Saili FS

Ofisa Lamepa

Soosoo Tuiilemotu FS
Gatai Patu AKF

Aoga Mauauga Kanana Fou

Siaosi Suhren FS

Pulega Fale Ta'u:

Ioane Ioane FS (Fitiuta)

Pulega Sua:

Waiana Tanielu FS (Masausi)
King Talamoni FS (Amaua)
Magaga Talo AKF (Masefau)

Pulega Sa'ole:

Setefano P. Lefale FS (Auasi)
Vili Polikapo FS (Amouli)
Edward Semaia FS (Aunuu)
Siavao Iese FS (Alofau)

Pulega Fagaloa Sisifo:

Tumau Petaia FS (Fagaalu)

Pulega Fagaloa Sasa'e:

Poutoa Leituala FS (Pago Pago)
Tamilo Palepua AKF (Pago Pago)

Pulega Itu'au

Isaako Matautia Jr FS (Fagasa)
Vagana Saili FS (Matuu&Faganeanea)
Ekueta Tyrell AKF (Nuuuli)
Meke Matautia AKF (Nuuuli)

Pulega Tafa o Kanana Fou

Tupuivao Ioelu FS (Petesa Tai)
Siaosi Suhren FS (Ierusalem Fou)
Gatai Patu AKF (Petesa Uta)

Pulega Tualatai:

Sinaka Ulutu FS (Malaeloa)

Pulega Tualauta:

Penani Lefaoese FS (Faleniu)
Veteran Brown AKF (Iliili)
Ronald Tuimauga AKF (Aolou)

Pulega Alataua:

Soosoo Tuiilemotu FS (Poloa)

Pulega San Francisco:

Moegagogo Tamasese FS
Eliu Eseroma FS (Daly City)
Ketese mane Tagaloa FS (Sacramento)
Peter Fualaau FS (Sacramento)
Vaise Poloka AKF (Sacramento)
Euta Asifofo AKF (Oakland)

Pulega Seattle:

Talosaga Patea FS (Seattle IV)

Pulega LA Matu:

Sugalu Filivaa AKF (Ola Fou LB1)
Malaki Tauiliili FS (Ola Fou LB1)
Emosi Liaina FS (Ola Fou LB1)
Malaga Tapafua AKF (Ola Fou LB1)
Niu Sapolu AKF (SCCC)

Pulega LA Saute:

Mose Mose FS (USC)

Pulega Las Vegas:

Folauga Tupuola FS (Etena Fou)
Saumaleato Fuimaono FS (Etena Fou)

Pulega Alaska i Matu:

Poasa Maui FS (Faavae Fou)

Pulega Alaska i Saute:

Tomasi Foilefutu AKF (Feagaiga Fou)
Troy Foilefutu AKF (Feagaiga Fou)

Pulega Amerika Sasa'e:

Tata Falaile AKF (Vaomoana)

Pulega Aukilani:

Tautalaaso Asiata FS (Ranui)
Iulio Pati AKF (Wiri)

LISI O 'AULOTU AVANO

O nisi ia o 'aulotu o le EFKAS ua avanoa i le taimi na lolomi ai lenei Lamepa, o le a aoga ai lenei lisi e saili ai so latou faifeau:

EFKAS Faleasao

IA SILAFIA: O 'ATA UMA O LE LAMEPA, E MAFAI ONA E MAIMOFA AI I LUGA O LE UPEGA TAFAILAGI, I LE TUATUSI:

<https://www.facebook.com/LamepaEFKAS/photos>

TAUTUA PRINTSHOP

EKALESIA FAAPOTOPOTOGA KERISIANO I AMERIKA SAMOA

1 Kanana Fou, Pusa Meli 1537, Pago Pago, Amerika Samoa 96799
Telefoni: +(684) 699-9810 / Tuatusi Upega Tafailagi: <https://efkas.org>